

आकाशवाणी जयपुर-अजमेर

प्रादेशिक समाचार

दिनांक 13.01.2025 समय: 18.45 बजे

- प्रधानमंत्री नरेन्द्र मोदी रो काल मिशन मौसम री सरुआत करण रो कार्यक्रम- मौसम अर जलवायु रा प्रति देश ने स्मार्ट बणावण री पहल।
- उपमुख्यमंत्री अर पर्यटन मंत्री दिया कुमारी कह्यो-प्रदेश रा दूर-दराज रा हलकां ने ई सैर-सपाटा री ठोड़ां रा तौर ऊं विकसित करण री कोशिशों करी जावेला।
- राज्य मांय काल पशु कल्याण पखवाड़ो सरु व्हेला- जिनावरां रा प्रति दया अर प्रेम जगावण रा मकसद ऊं भांत-भांत रा आयोजन व्हेला।
- प्रदेशभर मांय आज लोहड़ी पर्व री धूम-मकर संक्रांति रे मौके पतंगबाजी ने ध्यान राखता थकां राज्यपाल अर मुख्यमंत्री री चाइनीज डोरा काम नी लेवण री अपील।

000

प्रधानमंत्री रो काल मिशन मौसम री सरुआत करण रो कार्यक्रम है। मौसम अर जलवायु रा बारा मांय नुवी मौसम निगरानी तकनीक अर प्रणाली विकसित कर र रडार अर उपग्रहां रे मार्फत देश ने और बेहतर बणावण रा मकसद ऊं ओ मिशन सरु कर्यो जा रह्यो है। श्री मोदी नुवी दिल्ली मांय मौसम महकमा रा 150वां स्थापना दिवस समारोह मांय इण री सरुआत करेला। ई मौके वे मौसम अर जलवायु परिवर्तन अनुकूलन रा विभाग रो विज्ञान-2047 ई जारी करेला। प्रधानमंत्री नरेन्द्र मोदी आज कश्मीर मांय सोनमर्ग सुरंग रो उद्घाटन कीनो। ई मौके वे कह्यो के विकसित भारत रो संकल्प सांचो करण मांय टूरिजम हलका रो खास काम है। वे कह्यो के पर्यटन हलका सारु बेहतर कनेक्टिविटी जरूरी है।

000

केंद्रीय पर्यटन अर संस्कृति मंत्री गजेंद्र सिंह शेखावत कह्यो है के महाकुंभ आध्यात्मिक समागम सागे ई वैश्विक पर्यटन सारु ई ऐतिहासिक आयोजन है। आकाशवाणी समाचार सागे खास बातचीत मांय वे कह्यो के ई मौके पर्यटन मंत्रालय देशी अर अंतरराष्ट्रीय पर्यटन ने बधावो देवण सारु केई जतन कीना है। श्री शेखावत कह्यो के देश री समृद्ध सांस्कृतिक विरासत अर कुंभ मेळा रो महत्त्व बतावण वाळो अतुल्य भारत मंडप कुंभ मांय आवण वाळां ने अनोखो अनुभव दे रह्यो है।

000

उपमुख्यमंत्री दिया कुमारी कह्यो है के प्रदेश रा दूर-दराज हलकां मांय ई सैर-सपाटा री सोहवणी ठोड़ां विकसित करण री कोशिशों करी जावेला। वे पर्यटन विभाग री ओर ऊं ट्यूर ऑपरेटरां, होटल मालिकां अर पर्यटक गाइडां सारु राखी ज्यी कार्यशाला मांय बोल रही ही। दिया कुमारी कह्यो के राजस्थान आवण वाळा सैलानियां ने अनोखा अर यादगार राखण वाळा अनुभव देवण सारु और चोखा काम कर्या जावेला। खबरनवीसां सागे बातचीत करता थकां पर्यटन मंत्री कह्यो के सैर-सपाटा रा हलका मांय कौशल विकास अर क्षमता ने बधावण रो काम लगातार चालतो रेहवणो चाहिजे।

000

वित्त मंत्रालय 15 जनवरी ने नई दिल्ली मांय बैंकां रा प्रमुखां री मीटिंग बुलाई है। मीटिंग मांय जन सुरक्षा अर मुद्रा योजना रा कामकाज रो जायजो लियो जावेला। वित्तीय सेवा सचिव एम. नागराजू री सदरत मांय व्हेवण वाळी ई मीटिंग मांय पीएम स्वनिधि योजना समेत वित्तीय समावेशन री न्यारी-न्यारी योजनावां रा काम रा बारा मांय ई चर्चा करी जावेला।

000

जलशक्ति मंत्री राजभूषण चौधरी आज धौलपुर मांय मेडिकल कॉलेज अर जिला अस्पताल रो दौरा कीनी। वे अस्पताल मांय व्यवस्थावां रो जायजो ले र मरीजा सागे बातचीत कीनी। वां रो काल धौलपुर मांय जन-सुणवाई रो कार्यक्रम है।

000

प्रदेश मांय काल पशु कल्याण पखवाड़ो सुरु व्हेला। पशुपालन मंत्री जोराराम कुमावत बतायो के 30 जनवरी ताई चालण वाळा ई पखवाड़ा मांय ढांढां मांय बांझपन दूर करण अर ऑपरेशन रा शिविर लगा र बत्ता ऊं बत्ता जिनावरां रो ईलाज कर्यो जावेला। ई सागे ई संगोष्ठियां राख र जिनावरां री बीमारियां रे बारा मांय जाणकारी दी जावेला। ई रे अलावा पशु क्रूरता निवारण रा उपाय अर उचित पशु प्रबन्धन रा बारा मांय ई बतायो जावेला। श्री कुमावत बतायो के पखवाड़ा रे दौरान स्कूल-कॉलेजां मांय जीव जन्तुआं रा प्रति दया अर प्रेमभाव जगावण सारु काम कर्यो जावेला अर पशु कल्याण रा बारा मांय भांत-भांत री होड़ां राखी जावेला।

000

भीलवाड़ा मांय चाल रहया हरित संगम मेळा मांय आज चेतना यात्रा निकाळी ज्यी, जिण ने उद्योग राज्यमंत्री के.के. बिश्नोई हरी झंडी बता र रवाना कीनी। चेतना यात्रा रे मार्फत जीव दया, पर्यावरण ने बचावण अर साफ-सफाई राखण रो संदेश दियो ज्यो। ई मौके खबरनवीसां सागे बातचीत करता थकां श्री बिश्नोई कह्यो के ऐड़ा आयोजन जनता मांय जाग जगावण सारु जरूरी है।

000

लोहड़ी रो पर्व आज हरख-उमाव सागे मणायो जा रहयो है। नुवी साखां री कटाई र उपलक्ष मांय मणायो जा रहया ई पर्व रा बारा मांय पेश है एक रपट -

000

मकर संक्रांति रो पर्व काल मनायो जावेला। ई मौके जातरु सरोवर मांय पवित्र स्नान कर र दान-पुण्य करे है। ई सागे ई मलमास पूरो व्हेवण ऊं काल ऊं मांगलिक काम ई ओजू सुरु व्हे जावेला। संकरात ऊं पैली आज बाजारां मांय रौनक निजर आ रही है। तिल, फीणी अर गजक री दुकानां माथे मोटी तादाद मांय लोग खरीदी कर रहया है। रंग बिरंगी पतंगां अर चरखियां ऊं ई बाजार सज्योड़ा है अर बच्चां मांय कार्टून वाळी पतंगां री मांग सब ऊं बत्ती है। ई मौके काल पर्यटन विभाग री ओर ऊं जयपुर मांय जलमहल री पाल परां पतंग उत्सव राख्यो जावेला, जिण मांय देशी-परदेशी सैलानियां अर जनता सारु भांत-भांत रा कार्यक्रम अर सांस्कृतिक प्रस्तुतियां राखी जावेला।

000

जयपुर मांय पतंगबाजी रे कारण ज़ख्मी परिन्दां रा ईलाज सारु पशु चिकित्सा पॉलीक्लिनिक 20 जनवरी ताई संवारे आठ ऊं रात 8 बज्यां ताई खुलेला। पशुपालन विभाग रा शासन सचिव डॉ. समित शर्मा आ जाणकारी दीनी। ई दौरान अहलकारां अर कर्मचारियां री छुट्टियां रद्द कर दीरीजी है। वे बतायो के ज़ख्मी परिन्दां रो मौके ई ईलाज करण सारु मोबाइल यूनिट ई बणायी ज्यी है। राज्यपाल हरिभाऊ बागडे अर मुख्यमंत्री भजनलाल शर्मा लोगां ऊं पतंग उड़ावण सारु चाइनीज अर सिंथेटिक डोरा काम नी लेवण री अपील कीनी है।

000

प्रदेश मांय आवता दो-तीन दिन मांय पारो दो ऊं तीन डिग्री सेल्सियस ताई उतरण रा आसार है। मौसम विभाग रे मुजब बीकानेर, जयपुर, भरतपुर अजमेर अर कोटा संभाग मांय 15 अर 16 जनवरी ने कठे-कठे छांटो-छिड़को व्हेवण अर कठे-कठे ओला पड़बा रा आसार है। ई बीचे राज्य रा ऊगणी हलका मांय आज छांटा पड़्या, जदके सवाईमाधोपुर अर चित्तौडगढ समेत कठे-कठे घणो कोहरो रह्यो।

सिरोही मांय 4 डिग्री सेल्सियस न्यूनतम तापमान सागे शीतलहर रो असर रह्यो। चित्तौडगढ अर बाड़मेर मांय ई सींळो बायरो बाजण ऊं गलन बध ग्यी। चित्तौडगढ जिला रा बेगू मांय हल्की बिरखा रा समाचार है। महकमो जबरदस्त ठण्ड ने ध्यान राखता थकां बच्चां अर बुजुर्गां ने और सावचेती राखण री राय दीनी है। ई बीचे जोधपुर मांय पड़ रही जबरदस्त ठण्ड ने ध्यान राखता

थकां प्रशासन सरकारी अर गैर सरकारी स्कूलां रा बच्चां सारू काल अर 15 जनवरी ने छुट्टी रो ऐलाण कर दीनो है। जिला रा आंगनबाड़ी केन्द्रा मांय काल ऊं 18 जनवरी ताई छुट्टी रो ऐलाण कर दियो ज्यो है।

000

काल पूर्व सैनिक दिवस मनायो जावेला। पैली वाळा फौजियां रा समर्पण, बलिदान अर निःस्वार्थ सेवा रो मान करण सारू ओ दिन मनायो जावे है। ई मौके सप्त शक्ति कमांड री ओर ऊं जयपुर फौजी टेशन मांय जळसो राख्यी ज्यो है। रक्षा प्रवक्ता कर्नल अमिताभ शर्मा बतायो के इण मांय राज्यपाल हरिभाऊ बागड़े रो पैली वाळा फौजियां रो मान करण रो कार्यक्रम है। कर्नल शर्मा बतायो के वेटेरन्स-डे जळसो, सशस्त्र बलां री "हमारे वेटेरन्स, हमारा गौरव" री भावना ने मजबूत करे है।

000

प्रधानमंत्री किसान ऊर्जा सुरक्षा उत्थान महाअभियान रा तैत पाली जिला मांय लगायी ज्या सौर ऊर्जा संयंत्रां ऊं दस गांव बिजली रा हलका मांय खुद रे पाण ऊबा व्हे गया है। जिला रा ढाबर गांव रा किसान प्रभुदयाल जांगिड़ वां रा खेत माथे सूरज री रोशनी ऊं बिजली बणावण री मशीनां लगायी है। वे दूजा किसानां ने ई अ मशीनां लगावण बाबत प्रेरित कर रह्या है।

000